

萬有文庫

第二集七百七種

王雲五主編

明詩紀事

(九十二)

陳田輯

商務印書館發行

明詩紀事

(九十二)

陳田輯

國學基本叢書

明詩紀事卷二十四

辛籤

萬時華十三首

時華字茂先南昌人崇禎中徵士有溉園東湖二集。

黎遂球蓮鬢閣集茂先五言古出入陶謝七言律澹婉清麗如溫飛卿李商隱。

西江詩話崇禎末詔舉堪守令者茂先應徵北上抵邗江病劇粵東黎美周廣陵鄭超宗翠舟徑造茂先喜甚猶賦詩云病逢勛倍藥快聚夜頻觴臨沒口占二截半世殘書裏關門坐小樓虞卿是何物不了著書愁窮通真偶爾來去亦翛然我愛裴中令虛空不礙禪從容危坐而卒茂先詩尤工五言其氣深厚其姿淡逸。

徐世溥榆溪逸稿詩人萬茂先其言精美溫潤體備氣醇。

田按茂先田居詩陳士業舒伯言亟稱之集中七律清婉瀏亮尤爲獨絕。

歲暮田居有引 錄四

負疴中田歲律云暮時謝賓遊以親妙藥旁視四壁忽忽意動吟咏遂生積五日得二十首詩不云乎獨寐寤言余之謂矣。

幽居念疇昔日月忽已今無論悲與歡事事勞寸心宇宙一泡幻謗譽隨升沈誰識道旁牧慨慷揮黃金。

復思隆中叟三十逢知音。高臥北堂上羞同梁父吟。

獨處行易悲。我反甘茲獨。出門語嘿乖。聊此愼榮辱。歷覽貧士傳。幸同古賢躅。薄暮何所懷。凌風倚修竹。陶公有清怨。含意獨不歡。枕席晤千載。耳目皆悲端。衆但慕高節。此意終不傳。古壁照燈影。破爐生暮寒。孤憤託尙友。撫几流長嘆。

張薦隱深竹。仲蔚樂長蒿。風塵昧至性。幽翳良自逃。宅東有高畝。負甕聊周遭。左渠帶長川。蒼然山氣遙。卜築暫云始。綺季徐可招。榆柳前後列。蔬蔓縱橫交。長揖謂園叟。開春護新條。小人學爲圃。飛鳥營其巢。夕佳樓

朝登北城風怒號。沙飛十丈寒雲高。春鴻欲歸呼其曹。樓頭歌管聲嘈嘈。此地管絃朝復夕。父老經過多太息。城中少年那復知。云是當年僂公室。僂公生長自邊塵。百花洲畔吟餘春。秋風五桂散遙馥。兄弟出入皆朱輪。潮陽歸來遍紅巾。翰林樹幟城東門。堞摧櫓折鼓聲死。清池湛湛哀英魂。從者妻子十一人。葬著道士陳白雲。東風花開鎖空宅。狐啼鼠竄無朝昏。僂家之樓夕佳額。滄桑轉眼悲行陌。凭闌風物誰獨存。章流靜照西山色。城邊擊鼓白日低。明月光中烏夜啼。游人醉舞公獨悲。霜天客散颺朱旗。一朝幸遇李夫子。爲汝拂拭揚鬚眉。樓頭歌舞如昔時。樓下木主公安之。南州一片中華土。節義晶晶亘今古。後來孫許氣如虹。日月河山共吞吐。中原寇馬今復馳。江南江北多鼓輦。公排帝閭叫閭闔。爲我擊賊綏蒸黎。

西江志。僕家樓。元末僕列箴闔門死難。有司徒其樓於西北城角。以旌忠烈。萬歷間。更名夕佳樓。

春日張玄逸竹雪齋同朱鬱儀張曼胥胡實美戴大圓李雲將各賦

七子林中約。依然竹下盟。疏煙宜弱柳。輕雨澀春鶯。大業千秋社。偏師五字城。杜陵花事好。今日慰平生。

清涼臺懷古

高臺同一望。人照夕陽多。豐鎬餘亭榭。陳隋舊綺羅。美人曾玉樹。衰草失銅駝。怪得當時鳥。城邊喚奈何。

過素園理雲將遺集悽然有作

千遍題詩百舉觴。昔時風雨共閒房。藤陰尙覆攤書屋。樹影空搖看竹床。憶數春花紅在樹。或眠秋簟碧爲廊。相如狼藉多餘草。寂寞文園泣武皇。

下第送芑孫之蕪江兼訊崑銅諸子

淚盡蘋花不自由。與君同恨別孤舟。貧多去國家難問。賤欲嫌身客未休。月照離魂生古岸。霜催寒信入輕裘。尤憐脫劍逢知己。江南江北處處愁。

與黎美周徐巨源飲喻京孟瑤光昆仲三洲亭夜汎舟于湖有作

共選晴湖泛綠莎。三洲亭向午餘過。詩情入韻多因柳。酒氣分香半雜荷。島嶼斜連疑海近。樓臺深隱覺山多。知君近訪林逋宅。疏影梅魂近若何。美周來自西湖。

吏隱亭

橋水東西孺子鄰。當年仕隱各全身。龍蛇今古孤亭晚。桃李晴陰萬井春。大漢冰霜留氣韻。重湖煙月照精神。因君敢慢今時尉。簿領趨馳或有人。

孺子祠

舊宅曾聞傍水濱。祠堂古岸照嶙峋。五陵樹已迷狐兔。一榻香猶薦藻蘋。意氣何人傾赤社。英雄滿地兆黃巾。當年龍戰終多事。千古冥鴻屬外臣。

述懷

芙蓉萬樹照晨梳。短髮蕭蕭愧不如。老圃東家堪作伴。苧衫蓬鬢帶花鋤。
觀別

芙蓉無態颭寒波。只爲空江別怨多。欲識滿汀離別意。亂煙絲雨奈卿何。

馬猶龍八首

猶龍字季房。廬陵人有洛如館集。

蕭士瑋。蕭齋日紀。馬季房語余云。近人之詩。蕪音最多。切響甚少。何也。余謂律細格老。與年俱進。皮毛脫落。乃見其實。唐畜良馬。初不令其跳躑。每夜必繫其銜勒。不容親水草。旬餘。浮腫盡消。筋力怒張。日馳數百里。不倦饑渴。不能爲之困。作詩而多蕪。

音累氣皆由浮腫未盡耳。

書影蕭伯玉云。馬季房詩。黃茆白霧三千嶂。瘦馬單衫十八盤。林陵舊院繡幕鶯花三月雨。畫梁燕語六朝春。故自佳。愚山集。季房嘗夢誌公啖以乾松。香氣猶在口。遂棄制科業。一意談無生。然任達飲酒輒醉臥。閒遊金陵吳越及嶺海。皆以詩自娛。清新可誦。

西江詩話。季房洛如館集。宣城施愚山捐俸餞板。毘陵楊太史大鰲詩云。廬陵詩人馬季房。花片遊絲落腕長。又云。君看洛館存遺草。待得西湖使者傳。愚山時爲湖西憲副也。

田按。季房詩。清音亮節如豪竹。哀絲聽之令人意爽。

雪夜宿甯國寺

雪深林際寺。蕭瑟動寒松。言尋上方侶。頗諧塵外蹤。暝痕銷霧薄。履跡破苔封。野園烏雀亂。行人曠未逢。忘言永今夕。僧起叩寒鐘。

過青原清幽谷

山重水複谷名愚。一筇一屐吾與俱。過溪二十四道殊。一一坐石聽笙竽。碧篠黃花生石膚。青青寒蔓水中蒲。深潭皎潔明髭鬚。沁入心脾照骨癯。且復與君立須臾。摩挲雜樹辨根株。丹林秋燒引崎嶇。空山沙迹走麝麋。清幽僧舍隱如菰。雲竇寒泉瀉入廚。芋魁瑩滑如玉腴。山薑野菌當園蔬。青山白雲道不孤。世人欲覓無其途。誰爲後來繼我乎。林深蘿合鳥相呼。

信州水巖艤舟登飛雲閣

似是桃源道。頻通漁父船。蓮花披石秀。雲錦照川妍。江中有蓮花。雲錦石壁合空遺。蛻丹封不記年。瓊田鶴駕杳。故物爲誰傳。

過寶龍寺

幽蘭香一室。老柏翠當門。春信經年隔。燈花昨夜繁。清池開白曉。新月帶黃昏。猶有營巢燕。銜泥認舊痕。

蘆林菴贈石照師

蘆林雖一宿。已作數年期。泉莫鼓三疊。峯猶憶九奇。茶香通活火。菊老映疏籬。欲析無疑義。支公別有思。

武功山二首

知坐茅菴翠幾層。冷猿遙挂一枝藤。白雲峯頂千秋月。夜夜寒光照定僧。獨有空林出梵音。愛山不覺住山深。閒來欲問齊雲路。落葉蕭蕭不可尋。

安成石屋觀周日培新構草堂

松堂人靜晚煙稠。樹古雲龍小洞幽。獨倚曲闌看翠滴。不知山色在高樓。

徐世溥十三首

世溥字巨源。新建人。侍郎良彥子。崇禎時諸生。有榆溪詩鈔二卷。逸詩二卷。

方以智浮山集。巨源天姿過人。出以易直。下筆馳驟。秦漢唐宋。惟取其氣。任我舒卷。

西陂類稿。余到南州三載。求徐巨源文翰甚渴。自陳伯璣所刻榆溪集外。卽片紙不可得。今春聞羅飯牛誦巨源贈詩云。雲山已是無常主。更寫雲山賣與誰。又云。記得扁舟初過訪。草堂門外水齊天。令人諷嘆不已。

田按。巨源文學昌黎。有酷肖者。詩丰神茂削。有疏竹幽花之致。身遭亂離。憔悴哀吟。中有不堪卒讀者。晚歲遇盜而死。哀哉。

初夏苦雨毛浚明潛夫置酒寓樓

羣峯如主人。日對樓中客。客寓復幾時。又見荒草碧。嵯峨好髻鬟。倚天蒼翠滴。當其雲雷蒸。纓帶迷咫尺。豈不愛奇觀。孤懷難達夕。我心如青山。欲雨便頭白。一觴可晤言。所以資酒德。

丹陵觀

余寓齊源。寓東不數百步。爲丹陵觀址。村巫家其西偏。觀有田及山。並南唐齊王李景遠所施。齊源之爲齊。以此也。朝代漸更。林莊漫滅。齊王像亦移入旁小庵矣。惜其無文采賓客。故編史靡得而詳。作丹陵觀詩。用表源之所由名焉。

初夏

觀廢巫仍宅。黃冠似肯堂。谷雲虛象袞。澗水尙如簧。比屋通雞犬。單籬狎虎狼。淮南有鴻烈。應不忘南唐。不復論時節。閒中候自明。棟花風送袷。瓜蔓水通耕。輦草成趺坐。微泥得緩行。綠陰如夢裏。喚醒有啼鶯。人日送陳元水之金陵

正是東風七日天。草堂薄醉又經年。雪分浦色初知岸。晴破江寒未散煙。鐵騎頻關孤驛夢。金陵好寄遠遊篇。蒼茫詩思斜陽裏。無限離愁付短弦。

萬里長所居

溪上芙蓉照板扉。澄流激瀨濺荷衣。鷗鵠得食排沙睡。翡翠銜魚掠水飛。樵唱不知人在谷。漁歌真令客忘歸。山中明媚看如此。忍令波光趁落暉。

過舒子山莊賦別

爲愛騷人靜可羣。檐暉涵碧漾苔紋。遙同側帽吟移影。近佐支鐺煮沸雲。山鬼聽琴簞際伏。林猿擲果夜深聞。奇峯香竈平分取。留得秋光讓與君。

山莊寄懷石莊博菴

老得山居足自由。晴窗飯罷未梳頭。燕窺簾捲銜泥返。書被風掀帶葉收。小倦課奴尋藥種。乘酣信步似春游。惟嫌離索遠同調。每一花開憶獻酬。

三月三日同謝聖虞訪拙公并爲公定菴名

久淹冰雪閉游函。直到花時禮燕龕。春草屐憑康樂引。暮雲心向惠休參。難逢上巳重三會。新得嘉名百一菴。歸路催詩煙柳潤。仙壇斜雨共氤氳。

春詞

不飲已如醉。濛濛況日斜。遠鐘殘夢後。酒氣似梅花。

辛未春中逢晏山人彈陽關操

一別麻源酒幾傾。支離已見二毛生。十年風雨陽關曲。今日重聞第四聲。

書桃源圖

落英芳草閉桑麻。客到驚聞世代賒。津路早知紅樹引。秦人應悔種桃花。

初秋江上聞笛有懷同社諸子

似在天涯似比隣。若爲縹緲訴情親。西風一夜江湖白。處處蘋花惱殺人。

看晚穫值守齋上人經過卻寄香城諸師

又逢秋熟客愁增。爲羨高空萬念冰。三十九峯霜月滿。閉門便是六朝僧。

余正垣一首

正垣字小星。南昌人。副使曰德孫貢生。授主簿。有昔邪園集。

田按。徐巨源作南州四子傳。四子者。劉斯陸士雲。李奇平叔。鄧履中左之。余正垣小星也。四子皆能詩。余遍搜遺集。僅得小星平叔詩。二子無傳焉。附見名字於此。

豔曲

花氣和香煖。風絲伴帶長。凭欄呼小婢。莫去繡鴛鴦。

王猷定十首

猷定字于一。南昌人。貢生。有四照堂集。

韓程愈集。于一身長八尺。貌魁梧。意氣豁如。議論風發。談天下事。如觀手中菴摩羅果。纖細舉似。不失毛髮。爲文。猖狂恣睢。隨筆所如。無不深合理道。天資善書。臨池之技。可以籠鵝。客揚十餘載。所交客滿寰區。而梁公逖。史蓮菴。最其所善。時或飲酒。涕泗并下。其亦所感者深也。

靜志居詩話。于一以詩古文詞自負。對客斷斷講論。每舉一事。輒原其本末。聽之。盡心。蓋兼有筆札喉舌之妙者。其行書楷法。亦自通神。

王暉今世說。于一遭亂居廣陵。窮愁著書。力追大雅。海內能文之士。翕然推之。客死西湖。篇帙散失。大梁周司農刻其遺稿行世。

田按。于一詩。騷情古意。跌宕蕭寥。五律一體。尤哀咽動人。

螺川早發

月落秋山曉。城頭鼓角停。長江流剩夢。孤棹撥殘星。露溼鷗衣白。天光雁字青。蒼茫回首望。海岳一孤亭。

泊舟揚子橋

韎韐風濤外。閒心寄沈寥。馬嘶黃葉岸。人急暮江潮。塔影眠寒水。谿聲走斷橋。夢中敲古缶。長憶廣陵簫。

反揚州喜晤孫無言

卻訝秋還在。蕭條滿目非。江山千騎暗。城郭一人歸。見子南冠淚。猶驚楚客衣。庭花何爛漫。寂寞伴伊威。

阜城

莫問祖龍轡。嵇琴亦不聞。智愚千載事。今古一谿雲。寒鴉啼荒井。梟狐嘯野墳。往來多涕淚。幾誦蕪城文。

誕日口號

母逝悲今日。吾衰憶昔年。眼昏雙淚後。髮白五更前。狐嶺橫兵甲。龍塘買墓田。夢回先訓在。嗚咽蓼莪篇。

登燕子磯

來問草堂寺。初鐘已度橋。人煙屯石港。漁火上江潮。野戍重關靜。王畿設險遙。憑高天萬里。僧影共蕭蕭。

贈某上人

僧來方臥病。老去復逢春。煮藥妨茶竈。挑燈問海濱。琉璃能悟性。翡翠不謀身。剗卻詩名好。還娛白髮人。

贈王雪樵先生

黃流厭聽莫聽冰。古路隄河細似繩。愁過客邊新蜡臘。淚多家傍舊園陵。夔州以後論工部。凝碧歸來識右丞。誰說渡江東晉事。太原風概自棱棱。

聽柳敬亭說史

英雄頭肯向人低。長把山河當滑稽。一曲景陽岡上事。門前流水夕陽西。

青來爲公狄畫鵲令圖口占絕句

一鳥哀鳴訴九州。斷雲落日動荒邱。知君能寫飛鳴意。難寫無聲地下愁。

李奇一首

奇字平叔新建諸生

榆溪逸稿劉士雲有所遊平叔爲詩送之不得驚人句乃作送士雲遊蜀詩一時傳誦以爲李賀復生士雲非遊蜀也乃故誤其題以就其佳句耳平叔爲文非面如土色不止卒以瘵死

夕佳樓晚眺

平楚蒼蒼歸雁驚。葳蕤芳草傍寒生。天隨野色低春岸。雨帶江帆隱暮城。石壁遙將孤影落。遠山微透數峯明。卻開蘿徑遲明月。渺望煙波祇一泓。

舒忠讜一首

忠讜字魯直進賢人修撰芬孫崇禎庚午舉人

劉綖墓

石馬陰嘶霜葉飛。靈風陣陣捲斜暉。傷心馬革無歸日。萬里招魂葬蟒衣。

湯開先二首

開先字季雲臨川人知縣顯祖子有潭庵集

江西詩話季雲喜爲詩少慕徐文長後嗜鍾譚常因作十燈題舉友夏照殘身益幻看定妄難生之句以爲妙絕季雲詩傳平叔序而傳之稱其哀國篇雄深慷慨似法少陵惜亡其稿而又以乙酉後流離隱約變微之聲皆不復可得爲惜云

百花塔

塔在百花中花紅塔亦紅欄杆鶯報午鈴鐸鳥呼風野火將燒佛天香欲滿空至今洲上草金碧映芳叢

登青雲峯

選勝無如此地登頓令暑思冷於冰閒雲來去常如客亂石縱橫不礙僧寥廓入秋聲每應孤高得我氣相凌祠前古木斯人在任爾頽闌一曲凭

陳畫一首

畫字惟易金谿人諸生有雜言

江西詩徵惟易讀書躬行尤達於易爲艾千子所稱

山泉歌

左泉右泉照山影入山出山聽泉音遠山縹青近山碧大泉鐘鼓細泉琴泉上衣雲天女侍山下冷風仙

梵吟。無生鄉在山泉裏。欲問蓮池深更深。

明詩紀事卷二十五

辛籤

于奕正五首

奕正初名繼魯字司直宛平諸生有樸草

詩觀司直詩清真澹雅迴絕塵俗

靜志居詩話司直好古嘗集天下金石志雖未詳核亦足繼東陽王象之書其詩南學於楚然燕趙之風骨尙存

附按司直與劉侗著帝京景物略遊白門將續著南京景物略書未成而卒崇禎丙子元日讀史得陸士衡傳卒年四十三以爲亡讖已而果然年亦四十三也詩學竟陵清韻鏗然蓋彼法之錚錚者

從戒壇至淩碧峯下

一峯聳奇秀數里引人行石碎不受履下步聲鏗鏗路幽境屢換蒼翠難定名深洞限秋陽峭壁挂飛甍
寂不聞衆響萬壑自成聲巖下坐老衲古澹含山情歸去失前徑處處暮雲生

雨宿潭柘

山空不易眠忽聽千峯雨洶湧欲崩屋與山相吞吐百千萬億聲奇詭不可數深慮阻遊屐起坐窺雷宇